



Kurt Vonnegut (1922-2007) al è un scritôr merecan che al à scrit innomenâts romançs e ancje tantis contis. Al è considerât un dai scritôrs plui impuartants dal Nûfcent, cognossût soledut par Macel n. 5 o la crosade dai fruts, ispirât a la sô esperience te Seconde Vuere Mondiâl (al veve scombatût tes Ardenne e in Gjermanie). Altris siei libris innomenâts a son Glaç-nûf, La gulizion dai champions, Lis sirenis di Titan e Mari gnot.

Conseis dal scritôr merecan **Kurt Vonnegut** par scrivi une buine conte curte:

1. Dopre il timp di un perfet scognossût in mût che no i somei di vêlu butât vie dibant.
2. Dâi al letôr almancul un personaç par il cuâl tignî
3. Ogni personaç al varès di volê alc, ancje dome une tace di aghe.
4. Ogni frase e à di fâ une di chestis dôs robis: mostrâ un personaç o puartâ indevant la storie.
5. Scomence il plui dongje pussibil da la fin.
6. Sei sadic. No impuarte trop dolçs e inocents che a son i tiei personaçs principâi, fâs in mût che i sucedin robis tremendis cussì che il letôr al puedi viodi di ce tele che a son fâts.
7. Scrîf par dâi plasê dome a une persone. Se tu vierzis il barcon e tu fasis l'amôr cul mont, par dî cussì, la tô storie e cjaparà la polmonite.
8. Dâi ai tiei letôrs la plui part des informazions il prime pussibil. Che e ledi in casin la suspense. I letôrs a varessin di podê capî cussì ben ce che al è daûr a sucedi, dulà e parcè, in mût di jessi bogns di finî la storie di bessôi, tal câs che i grisons a vessin di mangjâ lis ultimissimis pagjinis.

***Conseis voltâts par furlan
de sartore de Osterie***